

Cynnwys

Cymorth, gwybodaeth a fformat amgen.....	2
Cysylltu â ni:.....	2
1. Cyflwyniad	2
2. Cwmpas.....	3
Yr hyn y mae'r polisi hwn yn ei gwmpasu	3
Yr hyn nad yw'r polisi hwn yn ei gwmpasu.....	3
3. Gosod a newid ein ffioedd	4
4. Deall eich ffioedd a'ch cyllid	4
Pa ffioedd sy'n berthnasol i mi?	4
Cyllid cynhaliaeth ar gyfer myfyrwyr ôl-raddedig.....	6
5. Talu eich ffioedd	7
6. Canslo, gohirio neu dynnu'n ôl	7
Canslo.....	7
Gohirio neu dynnu'n ôl	8
Ffioedd a dalwyd gennych chi, gan drydydd parti, neu noddwr.....	9
Newid modiwlau.....	9
Rhwymedigaethau o ran ffioedd	9
7. Credydau Ffioedd Dewisol	10
Credydau ac Ad-daliadau Ffioedd Dewisol	10
8. Costau ychwanegol	12
Deddfwriaeth a pholisïau cysylltiedig.....	13
Adborth	13
Datganiad yr Elusen	13
Gwybodaeth am y ddogfen	14

Cymorth, gwybodaeth a fformat amgen

Os oes angen y ddogfen hon arnoch mewn fformat amgen, [Cysylltwch â Ni](#) (ewch i www.open.ac.uk/contact), ffoniwch ni ar +44 (0)300 303 5303, neu cysylltwch â'ch Tîm Cymorth Myfyrwyr drwy [StudentHome](#) os ydych yn astudio gyda'r Brifysgol Agored ar hyn o bryd.

Cysylltu â ni:

Os bydd angen cymorth ac arweiniad arnoch ar gyfer y ddogfen hon, cysylltwch â wales-support@open.ac.uk neu ffoniwch ni ar +44 (0)29 2047 1170.

Rydym yn croesawu cyswllt yn Gymraeg. Gall Dysgwyr Cymraeg siarad â chynghorydd cymorth myfyrwyr yn Gymraeg ar +44 (0)29 2047 1170.

Fersiynau blaenorol: Ar gyfer newidiadau a wnaed i'r ddogfen hon, cyfeiriwch at y [cofnod newidiadau](#) ac ar gyfer fersiynau blaenorol gweler y Rheolau Ffioedd (Astudiaeth Ôl-raddedig a Addysgir) ar [dudalen Ianio'r Rheolau Ffioedd](#).

1. Cyflwyniad

- 1.1. Mae'r ddogfen hon yn amlinellu'r rheolau mewn perthynas â ffioedd, rhwymedigaethau o ran ffioedd ac ad-daliadau ffioedd ar gyfer myfyrwyr ôl-raddedig sy'n gymwys i dalu ffi Cymru. Mae'r gofynion o ran bod yn gymwys yn cyfeirio at y meini prawf penodol sy'n pennu pa ffi rydych chi'n gymwys i'w chael. I gael rhagor o wybodaeth, cyfeiriwch at y [Polisi Statws Ffioedd](#).
- 1.2. Gall ffioedd amrywio yn seiliedig ar y lefel astudio, modiwlau, a phryd y byddwch yn dechrau astudio. Mae'r ddogfen hon hefyd yn cwmpasu'r rheolau o ran taliadau a'r polisïau pe bai eich amgylchiadau'n newid. Dylech ddarllen y ddogfen hon ochr yn ochr â'r [Amodau Cofrestru](#), yr ydych yn cytuno â nhw wrth gofrestru. Mae'r Amodau yn cynnwys manylion am eich rhwymedigaethau o ran ffioedd a'r canlyniadau pe na fydddech yn talu. I gael arweiniad personol, cysylltwch â'ch [Tîm Cymorth Myfyrwyr](#).
- 1.3. Os hoffech gael gohebiaeth yn Gymraeg, nodwch hyn ar eich proffil [StudentHome](#). Gallwch hefyd ddiweddarau eich dewisiadau iaith drwy ddefnyddio'r [Ffurflen dewisiadau iaith](#) Gymraeg.
- 1.4. Cyfeirir at Y Brifysgol Agored fel “**Ni**” neu “**Ein**” drwy'r ddogfen hon a chyfeirir at fyfyrwyr fel “**Chi**” neu “**Eich**”.

2. Cwmpas

Yr hyn y mae'r polisi hwn yn ei gwmpasu

2.1. Mae'r Rheolau Ffioedd hyn yn berthnasol i'r holl fyfyrwyr sy'n gymwys ar gyfer ffioedd Cymru sydd wedi'u cofrestru ar gyfer modiwl ôl-raddedig a addysgir (naill ai fel modiwl ar ei ben ei hun neu fel rhan o gymhwyster) ar gyfer y flwyddyn academaidd 2025/26. Bydd modiwlau'r dyfodol yn dilyn y Rheolau Ffioedd sydd ar waith ar yr adeg honno. Gellir gwneud diweddariadau i'r polisi hwn er mwyn cywiro camgymeriadau, gwella eglurder, neu i gydymffurfio â'r newidiadau cyfreithiol.

Yr hyn nad yw'r polisi hwn yn ei gwmpasu

2.2. Nid yw'r rheolau hyn yn berthnasol i'r canlynol:

- Myfyrwyr ôl-raddedig nad ydynt yn gymwys i dalu ffi Cymru. Gweler y dudalen [Polisi Rheolau Ffioedd](#) i ddarllen polisiâu perthnasol eraill a'r [Polisi Statws Ffioedd](#) i gael manylion am y ffi y byddwch yn ei thalu.
- Cymwysterau israddedig neu gymwysterau Meistr Integredig, neu fodiwlau israddedig yr astudir ar eu pen eu hunain. I ddarllen y Rheolau Ffioedd perthnasol ar gyfer eich gwlad, gweler y dudalen [Polisi Rheolau Ffioedd](#).
- Modiwlau sy'n disgyn o fewn unrhyw flwyddyn academaidd arall ar wahân i 2025/26.
 - Gweler y [Rheolau Ffioedd](#) sydd ar waith yn ystod y flwyddyn academaidd honno.
 - Ar gyfer Rheolau Ffioedd cyn y flwyddyn academaidd 2025/26, nodwch fod pob gwlad wedi'i chynnwys mewn dogfen sengl.
- Graddau Ymchwil Ôl-raddedig. Gweler y [dudalen Polisi Rheolau Ffioedd](#) i ddarllen y polisiâu perthnasol.
- Rhaglenni prentisiaeth. Cysylltwch â'r [Tîm Cymorth ac Ymrestru Prentisiaid](#).
- Cyrsiau Byr lle na cheir credydau. Gweler yr [Amodau Cofrestru \(Cyrsiau byr\)](#).

- Microgymwysterau'r Brifysgol Agored. Gweler yr [Amodau Cofrestru \(Microgymwysterau a gyflwynir ar yr Amgylchedd Dysgu Rhithwir\)](#)

3. Gosod a newid ein ffioedd

- 3.1. Rydym yn caniatáu i'n myfyrwyr astudio ar ddwyseddau amrywiol a thros gyfnodau estynedig o amser. O ganlyniad, gall y strwythurau ffioedd, rheolau, a pholisïau newid yn ystod eich astudiaethau. I gael gwybodaeth fanwl am osod ffioedd, cyfeiriwch at [Bolisi Statws Ffioedd](#).
- 3.2. Caiff y ffioedd ar gyfer y flwyddyn academiaidd berthnasol eu cyhoeddi ar ddisgrifiad pob modiwl yn y [prospectws ar-lein](#) yn ystod gwanwyn y flwyddyn flaenorol (e.e., bydd y ffioedd ar gyfer blwyddyn academiaidd 2025/26 yn cael eu cyhoeddi yn ystod gwanwyn 2025).
- 3.3. Mae newidiadau i'r ffioedd yn adlewyrchu costau darparu cyrsiau a gwasanaethau. Mae hyn yn cynnwys costau staffio a chostau gweithredol, newidiadau i gyllid y llywodraeth neu'r corff cyllido cenedlaethol ar gyfer Addysg Uwch yng Nghymru ([Cyllid Myfyrwyr Cymru](#)), mynegeion chwyddiant fel y Mynegai Prisiau Defnyddwyr (CPI), Mynegai Pris Manwerthu (RPI), newidiadau o ran trethiant a chwyddiant cyflogau.
- 3.4. Gall newidiadau eraill i ffioedd gynnwys cyflwyno, addasu, neu dynnu cynigion, disgownt, a chynlluniau yn ôl er mwyn helpu i gwblhau astudiaethau neu i gofrestru ar gyrsiau pellach.
- 3.5. Byddwn yn rhoi gwybod am unrhyw newidiadau sylweddol i'r ffioedd a phryd y bydd y newidiadau hyn yn dod i rym mewn digon o amser.

4. Deall eich ffioedd a'ch cyllid

Pa ffioedd sy'n berthnasol i mi?

- 4.1. Cofrestru: Cewch eich hysbysu am ffioedd eich modiwl, y dulliau talu sydd ar gael, a'r terfynau amser i gofrestru. Telir y ffioedd mewn punnoedd sterling.

- 4.2. **Y Flwyddyn Academaidd Dymhorol:** Pan fyddwch yn dechrau astudio gyda ni, bydd Blwyddyn Academaidd Dymhorol, sef Hydref, Gaeaf, Gwanwyn neu Haf yn cael ei dyrannu ar eich cyfer. Caiff eich Blwyddyn Academaidd Dymhorol ei phennu gan ddyddiad dechrau'r modiwl cyntaf y byddwch yn ei astudio gyda ni tuag at eich cymhwyster. Gall eich Blwyddyn Academaidd Dymhorol newid os byddwch yn cymryd seibiant astudio neu os byddwch yn newid i gymhwyster newydd:
- **Blwyddyn Academaidd Dymhorol yr Hydref:** Os bydd eich modiwl cyntaf yn dechrau rhwng 1 Awst a 31 Rhagfyr, y diwrnod cyntaf o'r Flwyddyn Academaidd Dymhorol yw 1 Medi.
 - **Blwyddyn Academaidd Dymhorol y Gaeaf:** Os bydd eich modiwl cyntaf yn dechrau rhwng 1 Ionawr a 31 Mawrth, y diwrnod cyntaf o'r Flwyddyn Academaidd Dymhorol yw 1 Ionawr.
 - **Blwyddyn Academaidd Dymhorol y Gwanwyn:** Os bydd eich modiwl cyntaf yn dechrau rhwng 1 Ebrill a 30 Mehefin, y diwrnod cyntaf o'r Flwyddyn Academaidd Dymhorol yw 1 Ebrill.
 - **Blwyddyn Academaidd Dymhorol yr Haf:** Os bydd eich modiwl cyntaf yn dechrau rhwng 1 Gorffennaf a 31 Gorffennaf, y diwrnod cyntaf o'r Flwyddyn Academaidd Dymhorol yw 1 Gorffennaf.
- 4.3. **Cyfeiriad cartref:** Mae eich ffi yn seiliedig ar eich cyfeiriad cartref ar ddiwrnod cyntaf y Flwyddyn Academaidd Dymhorol y bydd eich modiwl cyntaf yn dechrau ynddi. Eich cyfeiriad cartref yw'r lle rydych yn byw fel arfer ac yn gyfreithlon ac ni all fod yn gyfeiriad dros dro nac yn gysylltiedig â'ch gwaith. I gael rhagor o fanylion, gweler y [Polisi Statws Ffioedd](#).
- 4.4. **Meini prawf preswyliaeth:** Os bydd eich preswyliaeth yn newid yn ystod eich astudiaethau, mae'n bosibl y bydd hyn yn effeithio ar eich rhwymedigaethau o ran ffioedd. Defnyddir meini prawf preswyliaeth i bennu a ydych yn gymwys i dalu ffi Cymru. I gael rhagor o fanylion, cyfeiriwch at y [Polisi Statws Ffioedd](#).

- 4.5. **Statws y cymhwyster:** Bydd eich statws ffioedd yn aros yr un peth drwy gydol eich cymhwyster os byddwch yn parhau i fyw yn y DU ac yn cynnal eich statws fel myfyriwr parhaus. Fodd bynnag, os byddwch yn adleoli y tu allan i'r DU neu'n dod yn fyfyriwr sy'n dychwelyd, caiff eich atebolrwydd o ran ffioedd ei ailasesu. Ni fydd hyn yn effeithio ar y ffioedd a godir arnoch ar gyfer y modiwl(au) rydych yn ei astudio ar hyn o bryd, ond bydd yn effeithio ar unrhyw fodiwlau yn y dyfodol. I gael rhagor o fanylion am y meini prawf ar gyfer myfyrwyr parhaus a myfyrwyr sy'n dychwelyd, a sut y gall unrhyw newidiadau i'ch amgylchiadau effeithio ar eich ffioedd, gweler y [Polisi Statws Ffioedd](#).
- 4.6. **Modiwlau annibynnol:** Os nad ydych yn astudio tuag at gymhwyster, caiff eich ffi ei hailasesu bob tro y byddwch yn cofrestru ar gyfer modiwl.

Cyllid cynhaliaeth ar gyfer myfyrwyr ôl-raddedig

- 4.7. **Meini prawf cymhwysedd:** Os byddwch yn astudio gradd Meistr o 180 o gredydau, mae'n bosibl y byddwch yn gymwys i gael cyllid cynhaliaeth gan [Cyllid Myfyrwyr Cymru \(CMC\)](#), a gall y cymorth hwn gynnwys benthyciad cynhaliaeth neu grant cynhaliaeth. Bydd y cynnyrch/cynhyrchion y byddwch yn gymwys i'w gael/cael yn dibynnu ar pryd y gwnaethoch ddechrau eich cwrs. I gael gwybodaeth fanwl am gymhwysedd a'r ffordd o wneud cais, cyfeiriwch at wefan [Cyllid cynhaliaeth ar gyfer myfyrwyr ôl-raddedig](#) CMC.
- 4.8. **Gweinyddu cyllid:** I gael unrhyw gyllid cynhaliaeth a ddyfarnwyd ar eich cyfer, rhaid i ni gadarnhau â [CMC](#) ein bod yn fodlon eich bod yn ymgymryd â'ch astudiaethau ac yn gwneud cynnydd digonol.
- 4.9. Gelwir y broses hon yn Cadarnhau Cofrestriad ac mae'n cynnwys defnyddio gwybodaeth am eich cyfraniad i gadarnhau eich bod yn astudio. Yna, byddwn yn adrodd ar hyn i [CMC](#) i'w alluogi i ryddhau eich cyllid. Mae'r broses hon fel arfer yn dechrau ar ôl diwrnod cyntaf eich modiwl, sef y pwynt lle byddwch yn atebol am eich ffioedd.
- 4.10. Telir y cyllid cynhaliaeth yn uniongyrchol i chi mewn tri rhandaliad bob blwyddyn, yn unol â'ch cyfraniad parhaus yn eich astudiaethau.
- 4.11. Ni fyddwch yn gymwys i gael rhandaliadau o'r cyllid cynhaliaeth os na fyddwch yn gwneud cynnydd ar eich cymhwyster. Er enghraifft, os byddwch yn ailadrodd cyfnod astudio neu'n gohirio eich astudiaethau.

- 4.12. Mae manylion pellach am y broses o fonitro eich cyfraniad a'ch ymgysylltiad a'r ffordd y defnyddir y wybodaeth hon wedi'u hamlinellu yn y [Polisi Presenoldeb a Chyfranogiad](#) a'r [Hysbysiad Preifatrwydd i Fyfyrrwyr](#).

5. Talu eich ffioedd

- 5.1. Mae eich rhwymedigaeth i dalu ffioedd a chanlyniadau peidio â'u talu wedi'u cynnwys yn yr [Amodau Cofrestru](#).
- 5.2. Ar gyfer nawdd, rhaid cyflwyno cytundeb nawdd wedi'i lofnodi fel addewid i dalu. Rydym yn derbyn y cytundeb hwn fel cadarnhad o'r taliad. Os na chaiff y cytundeb nawdd ei gyflwyno, mae'n bosibl y byddwn yn canslo eich cofrestriad ac yn gofyn am unrhyw ffioedd y mae'n rhaid i chi eu talu.
- 5.3. **OUSBA:** Mae'n bosibl y gallwch dalu eich ffioedd drwy ddefnyddio benthyciad gan The Open University Student Budget Accounts Ltd (OUSBA). Os byddwch yn dewis talu yn y ffordd hon, bydd OUSBA yn talu eich ffioedd i'r Brifysgol Agored ar eich rhan, a byddwch chi'n ad-dalu OUSBA naill ai mewn swm unigol neu mewn rhandaliadau misol. I gael rhagor o fanylion, ewch i [wefan OUSBA](#).
- 5.4. Os caiff taliad neu ddull talu y cytunwyd arno eu tynnu'n ôl neu os nad ydynt yn ddigonol, mae'n bosibl y byddwn yn canslo eich cofrestriad ac yn gofyn am unrhyw ffioedd fel y nodir yn y [Polisi Dyledion Myfyrrwyr](#).
- 5.5. Os bydd angen i chi dalu ffioedd dysgu i ni, mae'n bosibl y cewch eich atal rhag cofrestru i astudio yn y dyfodol oni bai eich bod yn talu ymlaen llaw neu'n rhoi dull talu a dderbynnir ar waith.
- 5.6. Os bydd angen i chi ailadrodd modiwl, rhaid i chi gofrestru eto a thalu'r ffi yn llawn. Byddwch yn talu'r ffi sydd ar waith ar yr adeg y byddwch yn ailadrodd y modiwl.

6. Canslo, gohirio neu dynnu'n ôl

Canslo

- 6.1. **Hawl i ganslo:** Mae gennych hawl i ganslo eich cofrestriad ar gyfer modiwl neu gymhwyster o fewn 14 diwrnod calendr i ddyddiad yr e-bost neu'r llythyr a anfonwyd yn cadarnhau ein bod wedi derbyn eich cofrestriad.

- 6.2. **Canslo cyn i'r modiwl ddechrau:** Os byddwch yn dymuno canslo eich cofrestriad ar ôl 14 diwrnod heb fod yn atebol am y ffioedd, rhaid i chi ganslo cyn dyddiad dechrau'r modiwl.
- 6.3. **Ad-daliad:** os bydd **paragraff 6.1 neu 6.2** yn berthnasol, byddwch yn cael ad-daliad llawn o'r ffioedd a dalwyd neu bydd unrhyw ffioedd sy'n weddill yn cael eu hepgor.
- 6.4. Dilynwch y gweithdrefnau canslo a nodir yn y [Polisi Newid Eich Cynlluniau Astudio](#).
- 6.5. Os byddwch yn canslo eich cofrestriad yn unol â **paragraff 6.1 a 6.2**, caiff unrhyw gytundebau am fenthyciad gan yr OUSBA eu canslo.

Gohirio neu dynnu'n ôl

- 6.6. **Monitro ymgysylltiad:** Rydym yn monitro eich ymgysylltiad yn unol â'r [Polisi Presenoldeb a Chyfranogiad](#). Os byddwch yn rhoi'r gorau i astudio heb ddilyn y broses ohirio gywir, gellir canslo eich cofrestriad ac atal unrhyw gyllid cynhaliaeth i sicrhau y caiff y cyllidebau cyhoeddus eu rheoli'n gywir.
- 6.7. **Dyddiad perthnasol ar gyfer gohirio neu dynnu'n ôl:** Mae'r dyddiad y byddwch yn gohirio neu'n tynnu eich cofrestriad yn ôl yn hollbwysig gan ei fod yn pennu eich cymhwysedd i gael ad-daliad o'r ffioedd neu i hepgor ffioedd a bydd yn effeithio ar eich cofnod academiaidd. Bydd achos o dynnu cofrestriad yn ôl yn weithredol o'r dyddiad y byddwch yn cysylltu â ni, neu'r dyddiad y gwnaethoch gymryd rhan weithredol yn eich astudiaethau, pa bynnag ddyddiad yw'r cynharaf. Mae **paragraff 6.16 a 6.17** yn amlinellu'r dyddiadau a ddefnyddir i gyfrifo eich atebolrwydd o ran ffioedd ac unrhyw ad-daliadau neu achosion lle y gellir hepgor ffioedd.
- 6.8. **Hysbysiad:** Rhaid i chi roi gwybod i ni am eich bwriad i ohirio neu dynnu eich cofrestriad yn ôl drwy ddefnyddio'r weithdrefn yn y [Polisi Newid Eich Cynlluniau Astudio](#). Ni fyddwch yn gymwys i gael ad-daliad o'r ffioedd os na fyddwch yn rhoi gwybod i ni.
- 6.9. **Talu'r ffi:** Rhaid i chi dalu'r ffioedd y cytunwyd arnynt hyd yn oed os byddwch yn gohirio eich astudiaethau yn y pen draw, oni bai eich bod yn gymwys i gael ad-daliad.

- 6.10. **Y dyddiad gohirio terfynol:** Y dyddiad gohirio terfynol yw'r dyddiad olaf y gallwch ohirio eich astudiaethau. Y dyddiad hwn yw'r diwrnod gwaith olaf cyn i chi sefyll yr arholiad neu gyflwyno'r asesiad diwedd modiwl (ADM) neu, ar gyfer modiwlau nad oes arholiad neu ADM ynghlwm â nhw, y diwrnod gwaith olaf cyn y dyddiad cau ar gyfer cyflwyno'r darn olaf o waith a gaiff ei asesu. Cyfeiriwch at [StudentHome](#) neu wefan eich modiwl ar gyfer y dyddiadau cau penodol.
- 6.11. **Gohirio benthyciad gan OUSBA:** Os byddwch wedi talu eich ffioedd drwy ddefnyddio benthyciad gan OUSBA, rhaid i chi roi gwybod i ni yn ffurfiol am eich bwriad i ohirio eich cofrestriad. Bydd rhoi'r gorau i'ch astudiaethau neu beidio â chwblhau eich taliadau heb roi gwybod i ni yn eich gwneud yn atebol am y ffioedd llawn ac unrhyw daliadau y mae angen eu talu fel rhan o'ch cytundeb credyd.
- 6.12. **Tynnu eich cofrestriad yn ôl:** Mewn achosion prin lle mae angen i ni dynnu eich cofrestriad ar gyfer modiwl, cymhwyster, neu raglen astudio yn ôl, caiff camau rhesymol eu cymryd i sicrhau y gallwch barhau â'ch astudiaethau fel yr amlinellir yn y [Cynllun Amddiffyn Myfyrwyr](#) a'r [Amodau Cofrestru](#). Os na fydd yn bosibl i chi barhau, mae'r [Polisi Ad-daliad a Digolledu](#) yn amlinellu'r meini prawf ar gyfer ad-daliadau neu ddigolledu.

Ffioedd a dalwyd gennych chi, gan drydydd parti, neu noddwr

- 6.13. Os gwnaethoch chi, trydydd parti neu noddwr dalu eich ffioedd (yn llawn neu'n rhannol), mae'n bosibl y byddwch/byddent yn gymwys i gael ad-daliad fel yr amlinellir yn **adran 6**.

Newid modiwlau

- 6.14. Os byddwch yn newid modiwl, caiff unrhyw ad-daliad sy'n ddyledus ei drosglwyddo i'r modiwl newydd. Rhaid i chi dalu'r gwahaniaeth os bydd pris y modiwl newydd yn uwch. Os bydd pris y modiwl hwnnw yn llai, byddwch yn cael ad-daliad o'r gwahaniaeth.

Rhwymedigaethau o ran ffioedd

- 6.15. Mae'r adran hon yn amlinellu eich rhwymedigaethau o ran ffioedd.
- 6.16. **Dim rhwymedigaeth o ran ffioedd:** Os byddwch yn gohirio neu'n tynnu'n ôl o fodiwl cyn iddo ddechrau, ni fydd angen i chi dalu unrhyw ffioedd.

- 6.17. **Rhwymedigaeth lawn o ran ffioedd:** Os byddwch yn gohirio neu'n tynnu'n ôl o fodiwl ar ôl iddo ddechrau, bydd rhwymedigaeth arnoch i dalu'r ffioedd yn llawn. Mae hyn yn golygu na fyddwch yn gymwys i gael ad-daliad.

7. Credydau Ffioedd Dewisol

Credydau ac Ad-daliadau Ffioedd Dewisol

- 7.1. **Cymhwysedd:** Gallwch wneud cais am Credyd Ffioedd Dewisol os byddwch yn gohirio neu'n methu modiwl oherwydd amgylchiadau anrhagweladwy a'ch bod yn gallu darparu tystiolaeth o hyn. Gellir gweld yr enghreifftiau o'r dystiolaeth ategol y gallai fod angen i chi eu darparu ar y Ganolfan Gymorth: [Gwneud cais am Credyd Ffioedd Dewisol neu Ad-daliad](#). Gellir ystyried yr amgylchiadau anrhagweladwy canlynol:
- marwolaeth aelod agos o'r teulu, partner neu ddibynnydd
 - analluogrwydd estynedig ar eich rhan chi neu ar ran aelod agos o'r teulu oherwydd salwch difrifol, damwain neu gyflwr meddygol
 - anabledd
 - analluogrwydd estynedig ar eich rhan chi o ganlyniad i feichiogrwydd neu famolaeth/tadolaeth neu fenthyg croth
 - analluogrwydd estynedig ar eich rhan chi o ganlyniad i fabwysiadu
 - analluogrwydd estynedig ar eich rhan chi oherwydd ailbennu rhywedd
 - newid mewn amgylchiadau cyflogaeth sy'n golygu na allwch barhau i astudio oherwydd natur eithafol y gwaith
 - camweinyddu ar ein rhan ni
 - newid mewn cyfrifoldebau gofalu
 - amgylchiadau eithriadol difrifol eraill y tu hwnt i'ch rheolaeth chi
- 7.2. **Sut i wneud cais:** Os byddwch yn credu eich bod yn gymwys i gael Credyd Ffioedd Dewisol neu Ad-daliad, ewch i'r Ganolfan Gymorth: [Gwneud Cais am Credyd Ffioedd Dewisol neu Ad-daliad](#) neu cysylltwch â'ch [Tîm Cymorth Myfyrwyr](#) i wneud cais. Byddwch yn derbyn y canlyniad yn ysgrifenedig gennym o fewn 10 diwrnod gwaith.

- 7.3. **Dyddiad cau ar gyfer gwneud cais:** Rhaid i chi gyflwyno eich cais am Gredyd Ffioedd Dewisol neu Ad-daliad o fewn 13 mis i ddyddiad dechrau'r modiwl rydych wedi ei ohirio neu ei fethu.
- 7.4. **Defnyddio Credyd Ffioedd Dewisol:** Gellir defnyddio Credydau Ffioedd Dewisol tuag at unrhyw fodiwl sy'n dechrau o fewn 13 mis i ddyddiad dechrau'r modiwl y gwnaethoch ei ohirio neu ei fethu. Os byddwch am astudio'r modiwl y gwnaethoch ei ohirio neu ei fethu eto ac os yw'r dyddiad dechrau nesaf y tu hwnt i'r cyfnod hwn, gellir defnyddio'r Credyd Ffioedd Dewisol yn yr un modd. Mae Credydau Ffioedd Dewisol a ddefnyddiwyd yn dod i ben ar ôl y cyfnod hwn ac ni roddir unrhyw ad-daliad. Ni ellir defnyddio Credydau Ffioedd Dewisol ar gyfer Microgymwysterau neu Raglenni Prentisiaeth.
- 7.5. **Swm a'r terfyn amser:** Gellir dyfarnu Credyd Ffioedd Dewisol ar gyfer hyd at 100% o'r ffi a dalwyd ar gyfer y modiwl rydych wedi ei ohirio neu ei fethu a gellir ond ei ddefnyddio unwaith. Os byddwch yn defnyddio Credyd Ffioedd Dewisol mewn taliad llawn neu daliad rhannol ac yna yn gohirio neu'n tynnu eich cofrestriad yn ôl, ni fyddwch fel rheol yn gymwys i gael Credyd Ffioedd Dewisol arall ar gyfer y modiwl hwnnw. Mewn amgylchiadau eithriadol, gellir cael caniatâd i ddefnyddio Credyd Ffioedd Dewisol am hyd at 25 mis ar ôl diwrnod cyntaf y modiwl y gwnaethoch ei ohirio. Cysylltwch â'ch [Tîm Cymorth Myfyrwyr](#) am ragor o fanylion.
- 7.6. **Dychwelyd i astudio:** Pan fyddwch yn dychwelyd i astudio, rhaid i chi dalu unrhyw ffioedd ychwanegol sy'n ddyledus.
- 7.7. **Taliadau trydydd parti:** Os gwnaeth trydydd parti dalu eich ffioedd, caiff y Credyd Ffioedd Dewisol ei anfon atoch chi.
- 7.8. **Methu'r modiwl T802:** Os byddwch wedi eich cofrestru ar gyfer modiwl T802 ac yn methu'r Aseiniad a Gaiff ei Farcio gan Diwtor (TMA01), mae'n bosibl y byddwch yn gymwys i ohirio'r modiwl hwn a chael Credyd Ffioedd Dewisol uwch o 80%. Rhaid i chi roi gwybod i ni am eich penderfyniad i ohirio o fewn 28 diwrnod calendr i'r dyddiad y gwnaethom gysylltu â chi ynghylch eich TMA01 a gafodd ei farcio.

- 7.9. **Methu modiwl:** Os byddwch yn methu modiwl gofynnol cyn symud ymlaen at y modiwl traethawd hir a'ch bod eisoes wedi cofrestru ar gyfer y modiwl traethawd hir, byddwch yn gymwys i gael Credyd Ffioedd Dewisol uwch o 80%. Mae hyn yn berthnasol ar gyfer ailsefyll arholiadau, ailgyflwyno gwaith a gohirio. Rhaid cyflwyno ceisiadau gohirio o fewn 28 diwrnod calendr i gyhoeddi'r canlyniad methu.
- 7.10. Gellir ond ystyried Ad-daliad Ffioedd Dewisol o dan yr amodau hyn:
- Marwolaeth myfyriwr cofrestredig neu fyfyriwr sydd wedi'i gofrestru.
 - Salwch difrifol ac annisgwyl am gyfnod estynedig ar eich rhan chi neu aelod agos o'r teulu, sy'n eich atal rhag dychwelyd i astudio o fewn 25 mis i ddyddiad dechrau'r modiwl ar gyfer y modiwl y gwnaethoch ei ohirio.
 - Achos difrifol o gamweinyddu ar ein rhan ni sydd wedi arwain at eich dymuniad i roi'r gorau i astudio a lle y cytunwyd â hyn ar y cyd â ni.
- 7.11. **Dyfarniadau eithriadol:** Mae'n bosibl y bydd Cynrychiolydd yr Is-Ganghellor yn caniatáu dyfarniadau eithriadol ar gyfer achosion y tu hwnt i'r meini prawf arferol.

8. Costau ychwanegol

- 8.1. Gallai costau ychwanegol gael eu codi arnoch wrth astudio fel ar gyfer cyfrifiadur, mynediad at y rhyngwrdd, teithio i diwtorialau a llyfrau gosod. Nid yw'r rhestr hon yn gynhwysfawr. Mae'n bosibl y bydd cymorth ariannol ar gael i fyfyrwyr ar incwm isel. Cysylltwch â'ch [Tîm Cymorth Myfyrwyr](#) neu gweler y dudalen [Cyllid costau astudio](#) am ragor o wybodaeth.
- 8.2. Os byddwch yn cofrestru ar gyfer modiwl gydag ysgol breswyl, chi sy'n gyfrifol am unrhyw gostau ychwanegol a gaiff eu codi arnoch er mwyn ei gwblhau. Mae hyn yn cynnwys costau llety a phrydau bwyd a ddarperir pan fyddwch yn bresennol yn yr ysgol breswyl. Rhoddir gwybod i chi am unrhyw gostau ychwanegol wrth gofrestru a dywedir wrthyfch pryd a sut y dylid eu talu.
- 8.3. Gall fod angen i fyfyrwyr sy'n astudio modiwlau Gwyddorau gydag ysgol breswyl gysylltu â darparwr allanol yn uniongyrchol i drefnu eu lle ac i wneud taliad. Mae rhagor o wybodaeth ar gael ar y disgrifiad o'r modiwl ar y prospectws ar-lein.

- 8.4. Nid oes angen i chi dalu ffi er mwyn ailsefyll arholiadau, ailsefyll arholiadau a gafodd eu gohirio, neu er mwyn ailgyflwyno eich Asesiadau Diwedd Modiwl.

Deddfwriaeth a pholisïau cysylltiedig

- [Rheolau Bancio Asesiadau](#)
- [Polisi Presenoldeb a Chyfranogiad](#)
- [Polisi Newid Eich Cynlluniau Astudio](#)
- [Amodau Cofrestru](#)
- [Datganiad Cydraddoldeb ac Amrywiaeth](#)
- [Polisi Statws Ffioedd](#)
- [Polisi Ad-daliad a Digolledu](#)
- [Safonau'r Gymraeg](#)
- [Siarter Myfyrwyr](#)
- [Gweithdrefn Gwyno ac Apelio i Fyfyrwyr](#)
- [Polisi Dyledion Myfyrwyr](#)
- [Cynllun Amddiffyn Myfyrwyr](#)

Adborth

Os bydd gennych unrhyw adborth ar y polisi hwn, e-bostiwch SPR-Policy-Team@open.ac.uk.

Datganiad yr Elusen

Corfforir Y Brifysgol Agored drwy Siarter Frenhinol (RC 000391), ac mae'n elusen eithriedig yng Nghymru a Lloegr ac yn elusen gofrestredig yn yr Alban (SC 038302). Caiff Y Brifysgol Agored ei hawdurdodi a'i rheoleiddio gan yr Awdurdod Ymddygiad Ariannol mewn perthynas â'i gweithgarwch eilaidd, sef broceru credyd.

Gwybodaeth am y ddogfen

Rhif y fersiwn: 1.0

Cymeradwywyd gan: Cynrychiolydd y Cyfarwyddwr, Gwasanaethau Academaidd

Yn weithredol o: 1 Awst 2025

Dyddiad adolygu: Mawrth 2026